

Na osnovu člana 13. Zakona o reviziji privatizacije državnog kapitala u privrednim društvima i bankama („Službene novine Federacije BiH“, br. 55/12), direktor Agencije za reviziju privatizacije putem Vlade Federacije Bosne i Hercegovine, Parlamentarnoj komisiji Federacije Bosne i Hercegovine i Parlamentu Federacije Bosne i Hercegovine dostavlja,

INFORMACIJU O IZVRŠENIM REVIZIJAMA PRIVATIZACIJE DRŽAVNOG KAPITALA PRIVREDNIH DRUŠTAVA I BANAKA U FEDERACIJI BOSNE I HERCEGOVINE ZA PERIOD JULI – DECEMBAR 2020. GODINE

UVOD

Agencija za reviziju privatizacije u Federaciji Bosne i Hercegovine (u daljem tekstu: Agencija) djeluje kao samostalna institucija u Federaciji Bosne i Hercegovine, čija je djelatnost propisana odredbama člana 7. Zakona o reviziji privatizacije državnog kapitala u privrednim društvima i bankama („Službene novine Federacije BiH“, broj 55/12) u daljem tekstu (Zakon).

Na osnovu člana 13. Zakona, Agencija je dužna svakih šest mjeseci putem Vlade Federacije Bosne i Hercegovine informirati Parlamentarno povjerenstvo Federacije Bosne i Hercegovine, Parlament Federacije Bosne i Hercegovine o izvršenim revizijama privatizacije državnog kapitala privrednih društava i banaka u Federaciji Bosne i Hercegovine.

Agencija ima svojstvo pravnog lica.

Sjedište Agencije je u Sarajevu, Ulica Ustanička 11, Ilidža.

Organizacija, upravljanje i rukovođenje Agencijom uređuje se Uredbom i drugim općim aktima Agencije, u skladu sa Zakonom.

Ostvarenje planiranih zadataka izvršit će se u skladu sa Zakonom, a oni se odnose na zaštitu prava građana utvrđenih Ustavom Federacije Bosne i Hercegovine državne svojine u procesu privatizacije u Federaciji Bosne i Hercegovine i javnog interesa zaštićenih vrednota, ukupnog pravnog poretka, javnog morala te postizanja ciljeva propisanih odredbama člana 4. Zakona o reviziji privatizacije na način da se utvrdi je li u postupku privatizacije došlo do povrede odredbi Zakona o privatizaciji.

STRATEŠKI CILJEVI

Agencija je u okviru svojih zakonskih ovlasti i obaveza djelotvornog i brzog izvršavanja povjerenih joj zadataka, utvrdila tri ključna strateška cilja koja će joj pomoći u realizaciji ostvarenja njezinih ciljeva:

Strateški ciljevi		
Uposliti revizorsko i administrativno osoblje koje ispunjava uslove za obavljanje poslova iz njene nadležnosti, u skladu sa posebnim uslovima utvrđenim Pravilnikom o unutrašnjoj organizaciji radnih mjesta Agencije.	Izvršiti profesionalno i odgovorno proces revizije privatizacije privrednih društava i banaka za navedenu godinu spram finansijskih sredstava i raspoloživosti ljudskih resursa, a u skladu sa Zakonom o reviziji privatizacije državnog kapitala u privrednim društvima i bankama.	U toku revizije privatizacije, a u skladu sa zakonskim obavezama, izvještavati Vladu FBiH, Parlament Federacije BiH i cjelokupnu javnost o procesima revizije u vidu izvještaja (polugodišnjih, godišnjih i završnog izvještaja).

PLAN RADA ZA 2020 GODINU

Odlukom Vlade Federacije Bosne i Hercegovine V. broj: 180/2020 od 06.02.2020. godine, usvojen je Plan rada za 2020. godinu, kojim je planirano 12 (dvanaest) privrednih društava i 2 (dvije) banke, koje treba revidirati.

RAD NA REVIZIJI PRIVATIZACIJE

Odgovornost revizora je sačiniti Izvještaj o obavljenoj reviziji pretvorbe i privatizacije privrednog društva i banke na osnovu utvrđenog činjeničnog stanja. Postupci revizije započinju donošenjem Rješenja o otpočinjanju revizije, te slanje svim relevantnim stranama dopisa za prikupljanjem dokumentacije potrebne za proces revizije.

Djelujući u tom smjeru, sprovode se aktivnosti koje prevashodno za cilj imaju prikupljanje dokumentacije neophodne sa sastavljenjem izvještaja o provedenoj reviziji privatizacije i analiziranje istih.

Najveći dio podataka i dokumenata prikuplja se od Federalne Agencije za privatizaciju i kantonalnih agencija za privatizaciju, Agencije za bankarstvo, kod privrednih društava i banaka kod kojih će se obaviti revizija, te od ostalih relevantnih institucija i organa koji su učestvovali u procesima privatizacije.

Revizija privatizacije u Federaciji BiH vrši se u skladu sa Zakonom o reviziji privatizacije državnog kapitala u privrednim društvima i bankama ("Službene novine Federacije BiH", broj 55/12), i Zakonom o reviziji institucija u Federaciji Bosne i Hercegovine ("Službene novine Federacije BiH", broj 22/06). Postupak revizije provodi se u skladu sa revizorskim standardima Međunarodne organizacije vrhovnih revizijskih institucija – INTOSAI ("Službene novine Federacije BiH", br. 30/11 i 62/14) i Etičkim kodeksom profesionalne etike revizora.

Bitno je naglasiti da je rad na revizijama privatizacije od pojave virusa COVID 19 bio otežan, što zbog prikupljanja dokumentacije, što zbog samih djelatnika u Agenciji.

U tekstu koji slijedi, prikazan je pregled pokrenutih revizija u drugoj polovini 2020. godine:

1. „Hotel Tuzla“ d.d. Tuzla

Rješenjem broj 01-02-1-220/20 od 26.05.2020. godine je pokrenut postupak revizije privatizacije privrednog društva „HOTEL TUZLA“ d.d. Tuzla ul. Zavnbobih-a br.13 75000 Tuzla nakon čega su Odlukom direktora imenovani ovlašteni revizori za reviziju privatizacije navedenog privrednog društva.

Odmah po otvaranju revizije pristupilo se prikupljanju dokumentacije.

Poslati su zahtjevi za dostavu dokumentacije prema Agenciji za privatizaciju Tuzlanskog kantona, Privrednom društvu „Hotel Tuzla“ d.d. Tuzla, Općinskom sudu Tuzla, Registru vrijednosnih papira FBiH, Finansijskoj informatičkoj agenciji (FIA).

Predmet je bio složen, ali želimo naglasiti da je saradnja za dostavu dokumentacije bila izuzetno korektna sa Hotelom Tuzla i otežana sa Agencijom za privatizaciju Tuzlanskog kantona dok sa ostalim navedenim institucijama saradnja je bila korektna. Takođe, u toku prikupljanja dokumentacije organizovani su sastanci u privrednom društvu „Hotel Tuzla“ i Agenciji za privatizaciju TK zbog potrebe uvida u određenu dokumentaciju. Jedan dio dokumentacije izuzelo je Tužilaštvo TK, i ustupilo nam je vještačenja sudskih vještaka građevinske i ekonomske struke.

Postupak revizije proveden je u periodu od 26.05.2020. godine do 23.09.2020 godine. U preduzeću Hotel „Tuzla“ d.d. Tuzla nije bilo ranije pretvorbe vlasništva na osnovu Zakona o društvenom kapitalu, samim tim ni izdavanja internih dionica, te nije bilo ni potrebe vršiti reviziju prethodno izvršene vlasničke transformacije.

Revizijom su obuhvaćeni dokumenti, odluke, poslovne knjige, ugovori i akti na temelju kojih je obavljena pretvorba i privatizacija, radi provjere da li je pretvorba i privatizacija provedena u skladu s odredbama Zakona o pretvorbi društvenih preduzeća, Zakona o privatizaciji i drugim posebnim propisima.

Nakon provedenog postupka revizije pretvorbe i privatizacije „Hotel Tuzla“ d.d. Tuzla sačinjen je Nacrt izvještaja o izvršenoj reviziji pretvorbe i privatizacije „Hotel Tuzla“ d.d. Tuzla. U skladu sa odredbom člana 16. Zakona o reviziji privatizacije u FBiH, Agencija za reviziju privatizacije u FBiH je 24.09.2020. godine Upravi društva „Hotel Tuzla“ d.d. Tuzla dostavila Nacrt izvještaja o izvršenoj reviziji pretvorbe i privatizacije na komentar/očitovanje koje je navedeno pravno lice bilo dužno dostaviti u roku od 15 dana od dana prijema Nacrta izvještaja. Uprava privrednog društva „Hotel Tuzla“ d.d. Tuzla je dana 20.10.2020. godine, u zakonskom roku Agenciji dostavila svoj komentar na dostavljeni Nacrt izvještaja.

Nakon dostavljenog komentara na nacrt izvještaja od strane društva dana 28.10.2020. godine doneseno je rješenje i konačan izvještaj i poslat privrednom društvu „Hotel Tuzla“ d.d. Tuzla, Agenciji za privatizaciju FBiH, Agenciji za privatizaciju TK, Vladi TK,

Ministarstvu trgovine, turizma i saobraćaja TK, Kantonalnom tužilaštvu TK i Pravobranilaštvu TK.

Na konačan Izvještaj i Rješenje Agencija za privatizaciju TK je dostavila Žalbu koja je 19.11.2020 prosljeđena Vladi Federacije BiH kao drugostepenom organu na odlučivanje.

U navedenom Revizorskom izvještaju revizori su konstatovali da postupak privatizacije Hotel „Tuzla“ d.d. Tuzla nije izvršen u skladu sa pozitivnim zakonskim odredbama.

2. “KTK Visoko“ d.d. Visoko

Rješenjem Agencije za reviziju privatizacije u FBiH broj: 01-02-1-193/20 od 20.04.2020. godine pokrenut je postupak revizije privatizacije društva “KTK Visoko“ d.d. Visoko, nakon čega su Odlukom direktora imenovani ovlašteni revizori za reviziju privatizacije navedenog privrednog društva.

Nakon ponovljenih zahtjeva i urgencija za dostavljenjem dokumentacije potrebne za postupak revizije privatizacije revidirano privredno društvo je dopisom od 15.07.2020. godine obavijestilo ovu Agenciju da ne posjeduju dokumentaciju u vezi sa postupkom privatizacije te da se sva dokumentacija nalazi u Agenciji za privatizaciju u Federaciji BiH. Revizori su tokom rada došli do saznanja da je i Kantonalna agencija za privatizaciju ZDK vršila postupke prodaje imovine navedenog društva u maloj privatizaciji, od koje je potom pribavljena dodatna dokumentacija.

Agencija za privatizaciju u FBiH je dio tražene dokumentacije dostavila u cd formatu. Revizori su nakon analize dostavljenog sadržaja izdvojili relevantnu dokumentaciju radi kompletiranja nacrtu izvještaja o reviziji privatizacije navedenog privrednog društva. Dodatna dokumentacija, osim Agencije za privatizaciju u FBiH, dostavljena je i od Federalnog pravobranilaštva, Federalnog ministarstva energije, rudarstva i industrije.

Postupkom revizije privatizacije privrednog društva „KTK Visoko“ d.d. Visoko utvrđeno je da postupak privatizacije nije u potpunosti proveden u skladu sa zakonima i drugim propisima, kako slijedi:

- U odobrenoj početnoj bilanci nije iskazana imovina u Republici Srbiji i Crnoj Gori i Kosovu.
- U Programu privatizacije raspored pojedinačnih stavki nije pravilno iskazan.
- Revizijom nije utvrđena kontrola izvršenja obaveza iz Ugovora o kupoprodaji Fabrike obuće Goruša i Fabrike regenerata i Fabrika galanterije iz 2014. godine.
- Na osnovu raspoloživih podataka revizori nisu bili u mogućnosti utvrditi namjenu zemljišta u skladu sa prostorno-planskom dokumentacijom u vrijeme odobravanja početnog bilansa stanja i programa privatizacije, odnosno tokom privatizacije društva. Ukoliko je pojedino zemljište po namjeni koja je određena prostorno – planskom dokumentacijom bilo utvrđeno kao „poljoprivredno zemljište“ tokom postupka privatizacije privrednog društva „KTK Visoko“ isto, prema odredbi člana 2. Zakona o poljoprivrednom zemljištu, predstavlja prirodno bogatstvo i dobro od

općeg interesa za Federaciju BiH. Takvo zemljište uživa posebnu zaštitu, te iako je u pravnom prometu ne može se prodavati odnosno, ne može se ni privatizirati.

3. „Velmos Company“ d.d. Mostar

Rješenjem Agencije za reviziju privatizacije u FBiH br. 01-02-1-284/20 od 29.07.2020 godine pokrenut je postupak revizije privatizacije privrednog društva „Velmos Company“ d.d. Tuzla, ul. Bišće polje bb 88 000 Mostar nakon čega su Odlukom direktora imenovani ovlašteni revizori za reviziju privatizacije navedenog privrednog društva.

Odmah po otvaranju revizije pristupilo se prikupljanju dokumentacije.

Poslati su zahtjevi za dostavu dokumentacije prema Agenciji za privatizaciju u Federaciji BiH, Privrednom društvu „Velmos Company“ d.d. Mostar, Općinski sud Mostar, Registru vrijednosnih papira FBiH, Finansijskoj informatičkoj agenciji (FIA).

Dostava dokumentacije od svih navedenih institucija je bila blagovremena.

Revizijom su obuhvaćeni dokumenti, odluke, poslovne knjige, ugovori i akti na temelju kojih je obavljena pretvorba i privatizacija, radi provjere da li je pretvorba i privatizacija provedena u skladu s odredbama Zakona o pretvorbi društvenih preduzeća, Zakona o privatizaciji i drugim posebnim propisima.

Nakon provedenog postupka revizije pretvorbe i privatizacije „Velmos Company“ d.d. Mostar sačinjen je Nacrt izvještaja o izvršenoj reviziji pretvorbe i privatizacije „Velmos Company“ d.d. Mostar.

Prema odredbama člana 16. Zakona o reviziji privatizacije u FBiH, Agencija za reviziju privatizacije u FBiH je 03.12.2020. godine Upravi društva „Velmos Company“ d.d. Mostar dostavila Nacrt izvještaja o izvršenoj reviziji pretvorbe i privatizacije „Velmos Company“ d.d. Mostar, na komentar/očitovanje koje je navedeno pravno lice bilo dužno dostaviti u roku od 15 dana od dana prijema Nacrta izvještaja. Uprava privrednog društva „Velmos Company“ d.d. Mostar, u zakonskom roku Agenciji nije dostavila svoj komentar na dostavljeni Nacrt izvještaja.

Dana 24.12.2020. godine doneseno je rješenje i konačan izvještaj i poslat privrednom društvu „Velmos Company“ d.d. Mostar, Agenciji za privatizaciju FBiH, Federalnom ministarstvo trgovine.

Na konačan Izvještaj i Rješenje nije bilo Žalbe i predmet je arhiviran.

Revizori su u postupku revizije, a na osnovu relevantne dokumentacije ustanovili da je privatizacija društva izvršena na zakonit način.

4. "Elektrobosna" d.d. Jajce

Rješenjem Agencije za reviziju privatizacije u FBiH broj: 01-02-1-290/20 od 05.08.2020. godine pokrenut je postupak revizije privatizacije društva privrednog društva "ELEKTROBOSNA" d.d. Jajce, te su imenovani ovlašteni revizori.

Privredno društvo je angažovalo advokatsku kancelariju za zastupanje, koji su u više navrata odgađali dostavljanje dokumentacije potrebne za postupak revizije zbog bolesti advokata (pozitivan na COVID 19). U konačnici je dostavljen dio tražene dokumentacije. Revizori su dopisom advokatske kancelarije obaviješteni da je preostala tražena dokumentacija uništena.

Poslati su zahtjevi za dostavu dokumentacije prema Agenciji za privatizaciju u Federaciji BiH, Agenciji za privatizaciju Srednjobosanskog kantona/županije, Općinskom sudu u Travniku, Registru vrijednosnih papira FBiH, Finansijskoj informatičkoj agenciji (FIA).

Prema odredbama člana 16. Zakona o reviziji privatizacije u FBiH, Agencija za reviziju privatizacije u FBiH je 03.12.2020. godine Upravi društva „ELEKTROBOSNA“ d.o.o. Jajce dostavila Nacrt izvještaja o izvršenoj reviziji pretvorbe i privatizacije. „ELEKTROBOSNA“ d.o.o. Jajce, na komentar/očitovanje koje je navedeno pravno lice bilo dužno dostaviti u roku od 15 dana od dana prijema Nacrta izvještaja. Društvo se putem opunomoćnika, tj. advokata obratilo Agenciji sa molbom za dodatnih 15 dana, na što mu je udovoljeno. Komentar društva se očekuje.

Prema mišljenju i nalazu revizora koji su radili na predmetu, utvrđeno je da postupak privatizacije privrednog društva „ELEKTROBOSNA“ d.d. Jajce Sarajevo nije proveden u skladu sa zakonskim propisima. U toku procesa revizije privatizacije utvrđeno je slijedeće:

- Postupak revizije prethodno izvršene vlasničke transformacije nije okončan. Revizorska kuća „Recon“ d.o.o. Sarajevo nije izdala rješenje o reviziji prethodno izvršene vlasničke transformacije. Prema raspoloživoj dokumentaciji, utvrđeno je da je revizorska kuća „Recon“ izdala Prijedlog rješenja koji je dostavljen Agenciji i društvu.
- Ne može se utvrditi tačnost početnog bilansa preduzeća, budući da nalaz revizije čini sastavni dio početnog bilansa preduzeća koje se privatizira.
- Dio zemljišta prijavljenog u postupku privatizacije „ELEKTROBOSNA“ d.o.o. Jajce je po svojoj namjeni koja je određena prostorno – planskom dokumentacijom utvrđeno kao „poljoprivredno zemljište“ i kao „šumsko zemljište“.

5. "Koksno – hemijski kombinat" d.d. Lukavac

Rješenjem broj: 01-02-1-102/20 od 17.02.2020. godine pokrenut je postupak revizije privatizacije privrednog društva "Koksno – hemijski kombinat" d.d. Lukavac u skladu sa usvojenim Planom revizija za 2020. godinu. U periodu od donošenja rješenja o pokretanju postupka revizije, revizori su se susretali sa poteškoćama u prikupljanju

dokumentacije neophodne za provođenje procesa revizije i izradu Nacrta izvještaja, a razlog više za isto je bilo proglašeno stanje pandemije korona virusa u FBiH.

Obzirom da se uspjela prikupiti potrebna dokumentacija sačinjen je Nacrt izvještaja br. 02-19-1-113-18/20 od 27.07.2020. godine koji je dostavljen Upravi „Koksno-hemijski kombinat“ d.d. Lukavac na očitovanje. Agencija nije dobila komentar upave privrednog društva „Koksno-hemijski kombinat“ d.d. Lukavac, te je sačinjen konačan izvještaj broj 02-19-1-113-19/20 dana 20.08.2020. godine i dostavljen privrednom društvu „Koksno-hemijski kombinat“ d.d. Lukavac.

Takođe izvještaj je dostavljen Agenciji za privatizaciju FBiH, Kantonalnoj agenciji za privatizaciju Tuzlanskog kantona, Ministarstvu industrije, energetike i rudarstva TK, te Vladi Tuzlanskog kantona. Na Konačan Nacrt izvještaja nije uložena žalba, te je navedeni predmet revizije okončan.

6. „Pan- papirna industrija TAČ“ d.d. Čitluk

Rješenjem broj 01-02-1-360/20 od 04.11.2020. godine je pokrenut postupak revizije privatizacije privrednog društva „Pan- papirna industrija TAČ“ d.d. Čitluk ul. Bare br.3 88 260 Čitluk, nakon čega su Odlukom direktora imenovani ovlašteni revizori za reviziju privatizacije navedenog privrednog društva.

Odmah po otvaranju revizije pristupilo se prikupljanju dokumentacije.

Poslati su zahtjevi za dostavu dokumentacije prema Agenciji za privatizaciju u Federaciji BiH, Privrednom društvu „Pan- papirna industrija TAČ“ d.d. Čitluk, Općinski sud Mostar, Registru vrijednosnih papira FBiH, Finansijskoj informatičkoj agenciji (FIA), društvu Natron dd Maglaj.

Predmet je izuzetno složen iz razloga što su i privredno društvo „Pan- papirna industrija TAČ“ d.d. Čitluk i društvo Natron d.d. Maglaj iskazala istu imovinu. Iako je u toku izrada Nacrta izvještaja i dalje se podnose zahtjevi za dokumentaciju i uvid u određene spise predmeta zbog neriješenih vlasničkih odnosa. Nad privrednim društvom je otvoren stečaj.

7. „Cooperativa promet“ d.d. Kiseljak.

Rješenjem Agencije za reviziju privatizacije u FBiH broj: 01-02-1-357/20 od 04.11.2020. godine pokrenut je postupak revizije privatizacije privrednog društva „COOPERATIVA PROMET“ d.d. Kiseljak.

Zahtjev za dostavljanje dokumentacije potrebne za reviziju privatizacije privrednog društva se vratio sa adrese društva, sa napomenom da isti ne postoji na adresi, iako mu je navedena adresa upisana u sudskom registru. Činjenica da revidirano privredno društvo ovoj Agenciji ne dostavlja podatke, informacije i dokumentaciju, niti može dati potrebna obrazloženja za potrebe provođenja postupka revizije privatizacije znatno

otežava sam postupak revizije privatizacije. Revizori su izvršili uvid na licu mjesta na adresi društva u Kiseljaku i uvidjeli da društvo ne postoji na registrovanoj adresi. 2009. godine u sudskom registru Općinskog suda u Travniku je upisana zabilježba pokretanja likvidacionog postupka, nakon čega je 2013. godine sudu dostavljen dopis kojim se naređuje brisanje zabilježbe o otvaranju likvidacionog postupka.

Poslani su zahtjevi za dodatnom dokumentacijom z. ured, sudskom registru privrednih subjekata, Općinskom sudu Travnik, Finansijsko-informatičkoj agenciji, Poreznoj upravi FBiH. Nakon kompletiranja dokumentacije revizori će na osnovu raspoložive dokumentacije i utvrđenih činjenica sačiniti Izvještaj o reviziji privatizacije.

8. “Konjuh” d.d. Živinice

Rješenjem broj 01-02-1-298/2 od 19.08.2020. godine pokrenuta je revizija postupka privatizacije “Konjuh” d.d. Živinice u skladu sa odredbama Zakona o reviziji privatizacije u F BiH i usvojenim Planom rada Agencije za 2020. godine, nakon čega su Odlukom direktora imenovani ovlašteni revizori za reviziju privatizacije navedenog privrednog društva.

Nacrt izvještaja o izvršenoj reviziji pretvorbe i privatizacije broj 02-15-1301-12/20 je završen i poslan upravi privrednog društva na komentar dana 21.01.2021. godine.

U zakonom ostavljenom roku, uprava društva nije dostavila Komentar/Očitovanje na Nacrt Izvještaja, tako da je Agencija dana, 16.02.2021. godine, sačinila Izvještaj broj: 02-19-1-301-13/20 i Rješenje broj: 01-02-1-298-3/20 od 16.02.2021. godine, o izvršenoj reviziji pretvorbe i privatizacije “Konjuh” d.d. Živinice. Rješenje i Izvještaj dostavljeni su u skladu sa članom 17. stav 3. Zakona o reviziji privatizacije državnog kapitala u privrednim društvima i bankama („Službene novine Federacije BiH“, broj 55/12).

Za ovaj predmet trenutno teče rok za žalbu.

9. “Tvornica žičanih proizvoda” d.d. Cazin

Rješenjem broj 01-02-1-355/20 od 03.11.2020. godine je pokrenuta revizija postupka pretvorbe i privatizacije “Tvornica žičanih proizvoda” d.d. Cazin u skladu sa odredbama Zakona o reviziji privatizacije u FBiH i usvojenom Planu rada Agencije za 2020. godine. Određeni dio dokumentacije neophodne za reviziju je već prikupljen, te se ista razmatra i analizira, dok se očekuje dostava i ostale dokumentacije za koju su podneseni zahtjevi za prikupljanje. Tako da je za ovaj postupak revizije još uvijek u toku izrada Nacrta izvještaja.

10. „Petrol“ d.d. Ljubuški

Rješenjem broj 01-02-1-436/20 od 15.12.2020. godine je pokrenut postupak revizije privatizacije privrednog društva „Petrol“ d.d. Ljubuški ul. Bana Jelačić br.23 88 320 Ljubuški.

Odlukom o imenovanju revizora imenovana su tri ovlaštena revizora za reviziju privatizacije navedenog privrednog društva.

Po otvaranju revizije pristupilo se prikupljanju dokumentacije.

Poslati su zahtjevi za dostavu dokumentacije prema Agenciji za privatizaciju u Federaciji BiH, Privrednom društvu „Petrol“ d.d. Ljubuški, Općinski sud Široki Brijeg, Registru vrijednosnih papira FBiH, Finansijskoj informatičkoj agenciji (FIA).

Postupak revizije još uvijek je u toku, te se radi na okončanju Nacrta izvještaja.

1. Hotel Dalmacija d.d. Kiseljak

Po Rješenju stručnog radnog tijela za pripremanje prijedloga drugostepenih rješenja koja donosi Vlada FBiH, a koja je datim Rješenjem vraćena Agenciji za reviziju privatizacije kao prvostepenom organu na ponovno odlučivanje, Odlukom direktora Agencije imenovana su pored ranijeg revizora koji je radio na predmetnoj reviziji, još dodatno četiri nova revizora za reviziju privatizacije privrednog društva Hotel Dalmacija d.d. Kiseljak.

Naime, Rješenjem Vlade Federacije BiH V.broj: 1550/20 od 12.11.2020. godine poništeno je Rješenje Agencije za privatizaciju u Federaciji BiH 01-19-1-443/16 od 12.12.2016. godine i predmet vraćen prvostepenom organu na ponovno odlučivanje. Agencija za reviziju privatizacije je obavijestila učesnike postupka privatizacije kao i Općinu Kiseljak o Rješenju Vlade Federacije, te je sa navedenim pravnim osobama održala sastanke radi utvrđivanja činjeničnog stanja.

U ponovnom postupku revizije je utvrđeno da „Banja Kiseljak“- Hotel Dalmacija“ d.d. Kiseljak i dalje vodi postupak utvrđivanja prava na nekretninama u skladu sa Uredbom u upisu u javne knjige nekretnina i prava na nekretninama u postupku privatizacije (Službene novine FBiH broj: 45/99).

Nakon obavljene ponovne revizije sačinjena je službena zabilježba revizora i na osnovu iste donesen je Zaključak od strane direktora Agencije za reviziju privatizacije u Federacije Bosne i Hercegovine da se:

1. Prekida se postupak kod ovog organa u predmetu revizija privatizacije privrednog društva „Hotel Dalmacija“ d.d. Kiseljak pokrenut Rješenjem broj: 01-19-1-443/16 od 12.12.2016. godine, odnosno postupak donošenja prvostepenog rješenja, shodno Rješenju Vlade Federacije Bosne i Hercegovine br. V.broj 1550/2020 od 12.11.2020. godine, zbog postojanja prethodnog pitanja.

2. Postupak će se nastaviti nakon okončanja postupka utvrđivanja prava vlasništva na nekretninama koji se vodi kod Službe za imovinsko-pravne i geodetske poslove i katastar nekretnina Općine Kiseljak, a koji se pojavljuje kao prethodno/prejudicijalno pitanje koje je neophodno riješiti, kako bi se sačinio Izvještaj o provedenoj reviziji privatizacije navedenog društva i donijelo Rješenje po istom.

„Hotel Dalmacija“ d.d. Kiseljak je putem svog punomoćnika izjavio žalbu na doneseni Zaključak, te je isto uradila i Općina Kiseljak. Obje žalbe su proslijeđene putem Agencije, Vladi Federacije Bosne i Hercegovine na nadležno postupanje kao drugostepenom organu.

1. „Poštanska Banka BiH“ d.d

Rješenjem Agencije broj: 01-02-1-221/20 od 26.05.2020. godine pokrenut je postupak revizije privatizacije „Poštanska Banka BiH“ d.d. Sarajevo, u skladu sa odredbama Zakona o reviziji privatizacije u FBiH i usvojenim Planom rada Agencije za 2020. godinu.

Shodno članu 12. Zakona o reviziji privatizacije državnog kapitala u privrednim društvima i bankama, u svrhu kompletiranja dokumentacije neophodne za provođenje procesa revizije i izradu nacrtu izvještaja ista je tražena od:

Federalnog ministarstva finansija, Agencije za bankarstvo FBiH, Registra vrijednosnih papira FBiH, Komisija za vrijednosne papire FBiH, Finansijsko-informatičke agencija, Općinskog sud Sarajevo, te od subjekta „Poštanska Banka BiH“ d.d. Sarajevo u stečajju i stečajnog upravnika koji je od Agencije za reviziju privatizacije tražio produženje roka od 35 dana, a koji mu je odobren aktom broj 02-15-1-238-10/20 dana 22.06.2020. godine.

Nacrt izvještaja o izvršenoj reviziji pretvorbe i privatizacije broj 02-15-1-238-17/20 sačinjen je dana 09.10.2020. godine i dostavljen Upravi, tj. stečajnom upravniku na komentar. Obzirom da Uprava/stečajni upravnik u zakonskom roku nije dostavio Komentar na Nacrt izvještaja, dana 02.11.2020. godine sačinjen je konačan Izvještaj o izvršenoj reviziji pretvorbe i privatizacije broj 02-15-1-238-18/20 koji je dostavljen uz Rješenje broj 01-02-1-221-4/20 dana 02.11.2020. godine subjektima u skladu sa Zakonom o izvršenoj reviziji pretvorbe i privatizacije. Na navedeni izvještaj nije bilo žalbe, tako da je isti postao konačan.

FAKTORI USPJEHA RADA I RIZICI

Napominjemo da se Agencija svakodnevno susreće sa poteškoćama u smislu provedbe Zakona o reviziji privatizacije. U najvećem dijelu to se ogleda u prikupljanju dokumentacije, jer u takvim slučajevima Agencija nema mehanizam da pokrene procedure kaznenih odredbi, a koje su kao takve navedene u Zakonu. S tim u vezi Agencija može tek da obavijesti nadležno tužilaštvo, što Agencija trenutno i radi. U

postupku revizije i primjene Zakona uočene su određene nejasnoće i neusklađenosti Zakona sa drugim općim zakonima u Federaciji Bosne i Hercegovine. Pojedine odredbe zakona su prevaziđene, a neke je opet nemoguće primjeniti, zbog toga je neophodno da se pristupi izmjenama i dopunama zakona.

S obzirom da je broj privrednih društava i banaka koje Agencija treba da revidira, a koje su privatizirane u prošlom periodu, znatno veliki, a isto tako i onih narednih privatizacija koje tek trebaju da se izvrše, za uspješno obavljanje revizija, neophodno je u budućem periodu raditi na povećanju budžeta kako bi se povećao broj revizora i administrativnog osoblja, a samim tim bi se povećao i broj revizija i po tom osnovu Agencija bi mogla u većem obimu uzimati predmete u rad. Agencija se već susreće sa obimnošću posla, a za to nema ni dovoljan broj administrativnog osoblja da može opslužiti i stizati sve zakonom definisane aktivnosti.

ZAKLJUČAK

Uspostavljanje Agencije za reviziju privatizacije i njena Zakonom i aktima Vlade Federacije Bosne i Hercegovine definisana djelatnost ima važnu ulogu u ostvarenju ciljeva ulaska u evropske integracije. Proces revizije privatizacije s aspekta evropskih integracija je veoma važan i bitan, što se pokazalo i kod Upitnika Evropske komisije upućenog Bosni i Hercegovini. Transparentnost procesa provedene privatizacije, najbolje se može sagledati kroz revidirani proces, što u konačnici traži i zahtjeva i Evropska komisija.

Agencija za reviziju privatizacije je u potpunosti spremna da izvrši sveobuhvatnu reviziju privatizacije na profesionalan i odgovoran način, na načelima dosljedne primjene Zakona, uputa i odluka Vlade Federacije Bosne i Hercegovine, transparentnosti u radu i otvorenosti za sve institucije i stručnu javnost, ali i primjerenog pravnog okruženja, te adekvatnog provođenja aktivnosti nadležnih institucija kako bi ostvarila uspješan rad i strateške ciljeve.

Broj: 01-04-1-167/21

Sarajevo, 25.02.2021. godine

DIREKTOR

Vedad Duraković, dipl.oec.